

MBIET MME ÑKPỌ HEAVEN

Mme Hebrew 9:6-28.

ỌYỌHỌ UKPEP-ÑKPỌ 440

Eke Mkparawa

IKỌ IBUOT: “Ema enim enọ owo ndikpa ini kiet, ndinyuñ nda ke itie-ikpe ke oro ebede” (Mme Hebrew 9:27).

Ataya

Ataya emi ekedi ebiet ukpono ọnọ nditọ Israel ke adaña mme isua emi mmọ ekeyode ke akai-ikọt, ekedi ufọk-ọfọn emi ekekemedede ndisuhọre nnim nnyuñ men ndaha ke adaña emi nditọ Israel edahade. Ke ini emi ewukde enye, adaha obubit-enyọn ke uwemeyo, ye adaha ikañ ke okoneyo osuhọre edidoro ke enyọn esie, ndiwut mme owo ete ke iso Abasi ke odudu ye mmọ.

Ataya ekedi ikpat aba ye ition ke uniọn ye ikpat efut ke ubom, enyuñ ebahare esin ke ikpehe iba. Akpa ikpehe, emi ekekotde Edisana Ebiet, ekedi ikpat edip ye duop ke uniọn ye ikpat efut ke ubom. Ke ọtọ oro ema enim itie uwa gold okpokoro uyo-iso, ye utuenikañ gold. Mme oku eduk ke ini mmọ kiet kiet ndinam utom oku mmọ ke ikpehe Ataya enye emi.

Ata ndodobi ọfọn ikpehe akabahare Edisana Ebiet ọkpọn Ata Edisana Ebiet (emi ekotde ñko Edisana Ndisana Ebiet). Edisana Ndisana Ebiet ekedi ikpat efut ke ñkañ mbinañ ye ikpat efut ke anyan idaha. Ke esit esie Ekebe Ediomini ama odu. Ekebe ekedi usọ eto emi ekedade gold efuk, emi mme itiat emi ekewetde mme Mbet duop ekesinede. Ke ekebe emi ñko eso manna ama esine, nte uwut-ñkpọ ukem manna emi nditọ Israel ekediade ke isua aba ke akai-ikọt; ye esañ Aaron emi okotibede onyuñ esehede emi okonyuñ eñwumde mfri. Abasi akanam utibe ñkpọ oro ndiwut mme owo ete ke Imọ ikemek Aaron, idighe mme ada ibuot eke mme esien duopeba, ndidi oku ke Ataya. Cherubim iba emi edade gold enam esuk iso ese Ñkpọ-itie Mbọm, emi ekedide okukip ọnọ Ekebe Ediomini. Ke ikpehe Ataya enye emi Akwa oku ikpọn ekeme ndiduk, oro edi ke Usen Usio-Isop ikpọn.

Usen Usio-isop

Usen Usio-isop ekedi ata akpan usen nduok-odudu mme Jew. Abasi ọkọtọnọ enye ko ke ini Akani Ediomini ke ini ekenode Ibet. Akana nte enim enye ini kiet ke isua, ke utit isua. Ekenyene ndidi usen emi mme owo ekekabarede esit ke kpukpru se mmọ ekeduede ke isua oro. Mmọ ekenyene nditua mkpọfiok ke abaña idiok-ñkpọ mmọ. “Enye edidi akakan Sabbath mbufo, mbufo enyuñ esuhọre esit mbufo” (Leviticus 16:31). Mmọ ekenyene ndiwa ediwak uwa ke usen oro, ọkọrọ ye edinam edifọp uwa kpukpru ini. Mme oku ñko ekenyene ndinam uwa ke abaña idem mmọ ke akpa ifet, man ekut ete ke imesana inyuñ idot ndinam utom mmimọ.

“Ke ediduok iyip miduhe, eridahado inyuñ iduhe” (Mme Hebrew 9:22). Ọtọnọde ke eritọnọ ini, ekeduok iyip ndida nsio isop (me erifen ke idiok-ñkpọ). Jesus ekedi man ọduok Iyip Esie man oto do ekpenyaña owo; edi kaña ke ini oro, nte ererimbot okosuk ebetde eridi Esie, ema esiwot ediwak unam man ekekem ye Ibet. Kpukpru iyip emi ekesiduokde ke ediwak isua oro ekedi mbiet Iyip Jesus onyuñ anyan ubok owut Jesus.

Ke ntre ke Usen Usio-isop, ke ini mme owo ekopde mfuhọ ke abaña mme idiok-ñkpọ mmọ, ekenyene ndiduok iyip ndinam mme oku esana ke akpa ifet mbemiso eke kpukpru owo. Ndikop mfuhọ ikekemeke. Akwa oku ekenyene ndimen iyip nduk ke Edisana Ebiet nnyuñ nsime ke Itie-Uwa Gold, ndien emen oduk Ata Edisana Ebiet enyuñ esime ke Ñkpọ-itie Mbọm ke abaña kpukpru owo. Emi ekedi ñko uwut-ñkpọ mfọn-mma ñkpọ emi ekenyenede ndidi ke ini Jesus edidide ke isọn onyuñ edi “mfọn-mma uwa,” ndien Enye eyeduk ke Heaven, “mfọn-mma Ataya.”

Ndusuk mme uwa ama odu emi ekesitade ke Ataya; ndien ndusuk ekedi mme ediñwọn uwa, emi ekesiñwọnde ke iso Jehovah. Kpukpru ñkpọ emi ekedi ndinam Ibet ọyọhọ, “tutu osim ini eke edidiọnde kpukpru ñkpọ” emi Jesus edidide, edi emi “ikeyetke esit” ibọhọke mmọ oro ekewade mme uwa ekeme ndise ini iso ke mbuotidem nnyuñ ñkut Jesus ke mmọ.

Ke ini Jesus ekedide, Enye ikekabakere idi Akwa Oku ikpōñ, edi ama awa Iyip Esie. Iyip Esie ama ekeme ndinam okpon akan se mme enañ ye ebote ekenamde. Ke ini nnyin ikabarede esit, ikop mfuhọ ke abañ idiok-ñkpọ nnyin inyuñ iboñ akam inọ Jesus iyom erifen, Iyip Esie eyet idiok-ñkpọ nnyin efep. Ke Iyip Esie nnyin imenyene odudu ndikan idiok-ñkpọ, emi ọwọrọde ete ke nnyin imekeme nditie inamke aba idiok-ñkpọ. Paul etiñ ọno nnyin ete ke Iyip Jesus eyet osio ke “mme mbukpo utom,” emi ọwọrọde ete ke mme owo ikenyeneke ndisuk ñka iso ñwa mme uwa unam aba.

Edikpono Ke Spirit

Jesus eketiñ ọno ñwan oro ke mben obube-mmōñ: “Ini ke edi, omonyuñ ededi ama, eke ata mme andituak ibuoit edituakde ibuoit enọ Ete ke spirit ye ke akpanikọ: koro edi mmọ eke etiede ntem ke Ete oyom ete etuak ibuoit enọ Imọ” (John 4:23). Oro edi usuñ emi nnyin inyenede ndikpono Jesus: nnyin iboñ akam inọ Enye, iyak uwem nnyin inọ Enye, iyak mme uduak nnyin inọ Enye, inim Enye ke akpanikọ. Ke ini Enye ọbọrọde akam nnyin, “Spirit ke Idem Esie etiene spirit nnyin edi ntiense ete, nnyin idi nditọ Abasi” (Ñwed Mbon Rome 8:16). Nnyin imọfiok ini emi nnyin imanade obufa. Nnyin imọfiok ini emi eyetde nnyin isana, ye ini emi nnyin ibode uduok-mmōñ Edisana Spirit. Ke mme ediwak ini efen Abasi ọno nnyin añwa-añwa ntiense nte iborọ akam nnyin. Nnyin ikpono odu-uwem Andinyaña emi oyomde ndinam nti ñkpọ nnọ nditọ Esie.

Esine-ufọt

Ke ini Abasi ọkọnọde Moses Ibet esok nditọ Israel, Moses ekedi esine-ufọt, enye ekedi andisine ke ufọt Abasi ye owo. Abasi esidọhọ Moses se enye editiñde ọno Nditọ Israel; nditọ Israel ñko esidọhọ Moses se enye editiñde ọno Abasi. Edi Moses ama etiñ ọno mmọ ete ke ini eyedu emi mmọ edinyenede esine-ufọt eñwen: “Jehovah Abasi fo eyenam Prophet eke edibietde mi, adaha ada ke otu fo ọno fi: enye ke mbufo edikop enọ” (Deuteronomy 18:15). Mme Jew ke ini Christ ekesuk eyom “ndikpañ utọñ” nnọ Moses, edi Moses ke idem esie ama etiñ ete ke mmọ ekenyene ndikpañ utọñ nnọ Jesus. Utom nnyin mfin edi ndidu uwem nte ekemde ke mme ewuhọ emi Jesus ọkọnọde.

Ikọ oro “ediomi,” nte ewetde ke ukpep-ñkpọ emi, ọwọrọ uduak. Ke ini owo anamde uduak, ndikpōñ se enye enyenede nnọ mbon ufok esie mme mmọ efen, oro isọñọke ida ibọhọke tutu enye ama akpa. Jesus ama anam “uduak” Esie, ndutim Esie ke abañ erinyaña ukpōñ, ndien ñko ama akpa ndinam emi ọsọñọ ada. Koro Jesus ama akpa onyuñ ọtọñọ ntak eset, nnyin ikeme ndinyene nsi-nsi uwem. Ndien Iyip oro Enye ọkọduokde ke mkpa eyet idiok-ñkpọ efep ke esit nnyin onyuñ anam nnyin ibeñe idem inọ Heaven.

Nte mbiet ediyet asana emi, Moses okowot mme unam onyuñ osime iyip ke mme ñwed “akpa ediomi,” mme Mbet. Enye ñko ama osime ke Ataya ke akai-ikọt, kpa ye mme owo ñko. Emi ekedi mbiet ñkpọ ete ke ini eyedu eke edinamde nnyin isana oto ke Iyip Jesus.

Ataya oro ke wilderness ekedi mbiet Ataya eke Heaven. Iyip nyara enañ ye eke ebote ema ekeme ndinam Ataya eke ererimbot asana, edi Ataya eke Heaven emi Jesus okodukde okoyom Iyip eke ọfonde akan, ke ntre Jesus akada Iyip Esie ke ini Enye okodukde ke Ataya eke Heaven ndinam mkpe-ubok mbaña nnyin ke iso Abasi. Ndien ini kiet ama ekem, Enye ikenyeneke ndinam oro kpukpru isua nte akwa oku ekesinamde. Enye akanam oro ini kiet “ke utit ererimbot,” emi ọwọrọde ke ini emi akanade nte Enye edi; midighe, nte ewetde ke ebiet efen, “ke uyọhọ ini” (Ñwed Mbon Galatia 4:4). Enye ama anam mme Ikọ Abasi osu nte mme anditiñ ntiñ-nnim ikọ ekebemde iso etiñ.

Mkpa Enyene Ndidu

Ibuot ikọ kiet odu ke Ikọ Abasi emi kpukpru owo enimde ke akpanikọ: “Ndien kpa nte ema enim enọ owo ndikpa ini kiet” (Mme Hebrew 9:27). Yak ndidem ye mme adikara esọñ odudu nte esọsọñ, ke awarade mme ebighide mmọ eyekpa ndien owo efen ada itie mmọ. Mme ekpep-ñkpọ obote ekeme ndifiok ñkpọ ata eti eti, edi, mmọ ñko, enyene ndikpa ke ini mmọ ekemde. Mme ọkwọ ikwọ ye mbon mbre ekeme ndinam mme owo enyene inemesit ke anyan ini uwem mmọ, edi uwem mmọ ñko, enyene nditre.

Ye anditiene-Christ, mkpa edi ndibe nduk ke Isọñ eke ọfonde akan. Edi idiok owo eyebo nsi-nsi ufen. Kpukpru owo kiet kiet, eti mme idiok, eyeda ke ikpe ke enye ama ọkpōñ uwem emi. “Ndinyuñ

nda ke itie-ikpe ke oro ebede;” osuk edi Ikọ Abasi kpa nte ikọ emi ọdọhọde ete kpukpru owo enyene ndikpa. Edi ata akpan nkpọ nnyin ndibeñe idem mbaña ubiere Ikpe oro.

Jesus ama ekpe ekọm-urua ufak nnyin, ndien nnyin kpukpru imenyene ifet ndiduñ ye Enye ke nsi-nsi. Edieke nnyin ibeñede idem, nnyin ke isese ye udọñ ndikut Enye. Enye eyenọ nnyin ikpọkidem ubọñ emi idomo midisimke aba man anam idiọk-nkpọ, me ndikop ubiak, me mfuhọ.

MME MBUME

- 1 Ataya ke akai-ikọt okokpon didie?
- 2 Nso ikabahare Edisana Ebiet ye Edisana Ndisana Ebiet?
- 3 Nso ikodu ke esit Ekebe Ediomi?
- 4 Nso ikedi Usen-Usio-Isop?
- 5 Nso iyip ke Jesus akada oduk ke Heaven ke ini Enye akadade itie nte Oku?
- 6 Nso ke Iyip Jesus ekeme ndinam?
- 7 Nso ke Jesus eketiñ ọnọ nwan oro ke mben obube mmọñ?
- 8 Nso idi esine-ufọt? Anie ke Moses ọkọdọhọ ete eyedi nte esine-ufọt?
- 9 Nso idi ediomi?
- 10 Nso itibe ke mkpa ebede?